



Lebih 50,000 kunjungi Karnival Udara Antarabangsa Melaka 2023

Nazri Abu Bakar - Oktober 1, 2023 @ 6:32pm

bhnews@bh.com.my

MELAKA: Lebih 50,000 pengunjung direkodkan mengunjungi Karnival Udara Antarabangsa Melaka (KUAM) 2023 yang berlangsung tiga hari di Lapangan Terbang Antarabangsa Melaka (LTAM) Batu Berendam, di sini, berakhir petang ini.

EXCO Pelancongan, Warisan, Seni dan Kebudayaan negeri, Datuk Abdul Razak Abdul Rahman, berkata jumlah berkenaan mengatasi sasaran 45,000 pengunjung disasarkan Kerajaan Melaka untuk karnival dwitahunan itu.

Berikutan itu, katanya, karnival sama akan diadakan pada tahun hadapan sempena Tahun Melawat Melaka 2024 (TMM2024) walaupun kebiasaannya ia diadakan dua tahun sekali.

Katanya, KUAM 2023 yang dirasmikan oleh Yang Dipertua Negeri Melaka, Tun Mohd Ali Rustam, antara lain membabitkan pertunjukan 41 pesawat pelbagai saiz, termasuk 27 pesawat kecil dari kelab penerbangan, enam paramotor dan sebuah pesawat 'microlight'.

Acara lain, pertunjukan payung terjun, persembahan aerobatik pesawat, pameran kerjaya badan beruniform dan akademi penerbangan, perkhidmatan 'joyride' dengan pesawat Heli Bell 407GX serta aktiviti simulator oleh Pihak Berkusa Penerbangan Malaysia (CAAM).

Turut dianjurkan ialah taklimat kerjaya penerbangan, pertandingan fotografi, pertandingan TikTok dan pertandingan mewarna membabitkan peserta kanak-kanak.

"Orang ramai sanggup berjalan jauh berkilometer untuk ke KUAM 2023 selain meletakkan kenderaan di Pusat Dagangan Antarabangsa Melaka (MITC) di Ayer Keroh dan menaiki bas yang disediakan. Kita akan buat penambahbaikan termasuk jualan tiket secara 'online' selepas ini untuk elak kesesakan."

"Selain itu, menambah bilangan pameran dan jemputan antarabangsa yang lebih hebat bagi KUAM 2024," katanya yang mewakili Ketua Menteri, Datuk Seri Ab Rauf Yusof pada majlis perasmian karnival terbabit.

Ketika membacakan teks ucapan Ketua Menteri, beliau berkata, Melaka menerima kehadiran 6.043 juta pelancong pada 2022 berbanding 2.665 juta pada tahun sebelumnya, meningkat 3.378 juta atau 126.76 peratus.

"Seramai 5.637 juta atau 93.27 peratus pelancong pada 2022 ialah pelancong domestik, manakala 406,517 atau 6.73 peratus lagi pelancong asing," katanya sambil memaklumkan, pelbagai inisiatif disusun dalam TMM 2024 bagi menyambut pelancong.

Ia, katanya, termasuk usaha mempromosi sektor pelancongan, memperindah serta menaik taraf produk berkaitan dan mewujudkan pelbagai pakej pelancongan, selain mengalau-alukan cadangan memperluas pelaburan, termasuk pelaburan dalam sektor itu dan perkhidmatan penerbangan.

Sementara itu, EXCO Kerja Raya, Infrastruktur, Kemudahan Awam dan Pengangkutan negeri, Datuk Hameed Mytheen Kunju Basheer, berkata LTAM bakal diaktifkan semula membabitkan laluan Melaka-Pekan Baru di Indonesia serta Pulau Pinang dan Kota Bahru.

"Kita kini menunggu maklum balas tujuh syarikat penerbangan untuk kembali beroperasi di LTAM. Laluan penerbangan dijangka turut membabitkan Melaka dan Padang di Indonesia, sekali gus membolehkan LTAM kembali 'hidup' kelak."

"Kita akan menyediakan perjanjian terperinci untuk memastikan tiada syarikat penerbangan menamatkan perkhidmatan sesuka hati seperti sebelum ini. Bagi memastikan kepentingan kedua-dua pihak, perjanjian ini penting untuk memastikan LTAM mampu beroperasi dengan baik," katanya.

Katanya, tiada perjanjian di antara syarikat penerbangan dengan kerajaan negeri menjadi antara faktor kegagalan LTAM meneruskan operasi sebelum ini, selain ketiadaan penumpang dan bagi menangani isu itu, kerajaan negeri akan memberi insentif berkaitan bersama perjanjian yang akan dimuktamadkan.